



ZAmolxis ille apud Getas Germaniæ Septentrionalis incolas natus et educatus fuit. quàm primum uerò per ætatem licuit, patriam relinquens amore uirtutis in Italiam profectus est, cū Tarquinius Superbus Romæ regnaret. Ibi uerò cum Pythagoræ eruditionem decantari intellexisset, sese statim ad eundem contulit, atque magnam rerum diuinarum & humanarum cognitionem ab eo acquisiuit. Diu enim ipsius auditor existens, cum eo familiariter uixit. Postea ad Aegyptios profectus est, & plurima de reb. naturalibus recõdita suis artibus adiecit. Cū itaq; multis uirtutib. & artib. ornatus in patriam reuersus esset, in summo honore ab omnibus fuit habitus. nam prodigia, auguria, & somnia magna hominum admiratione interpretabatur. In primis docebat fugiendos & à corpore abscindendos languores, ab anima imperitiam, à uentre luxuriam, à ciuitate seditio nem, à domo discordiam & intemperantiam. Disputauit etiam de immortalitate animorum, & omnes hoc modo ad uirtutes excitauit.